



Stranka Demokratske Akcije Sandžaka  
Democratic Action Party of Sanjak

**Republičko tužilaštvo za organizovani kriminal**  
**Miljko Radisavljević, specijalni tužilac**

Zahtjev za pokretanje istrage o pokušaju ubistva Predsjednika SDA Sandžaka i ministra u Vladi Republike Srbije dr. Sulejmana Ugljanina i neovlašćenom oružanom upadu u službene prostorije Stranke demokratske akcije Sandžaka od 16. i 17. januara 2009. godine

Uvaženi,

Želim da Vam skrenem pažnju na težak zločin koji već punih šest godina nije riješen čime je očigledno pokazana i dokazana sprega i organizovanost između izvršioca ovog zločina i nadležnih državnih organa čiji je posao i službena dužnost bila da ga rasvijetle.

Naime, 16. i 17. januara 2009. godine, grupa naoružanih ljudi neovlašćeno je upala u službene prostorije SDA Sandžaka koje su zatim puna dva dana držali pod oružanom opsadom. Oni su pored neovlašćenog oružanog upada, 17. januara 2009. godine uveče u nekoliko navrata pokušali ubistvo najvišeg rukovodstva SDA Sandžaka, u prvom redu Predsjednika dr. Sulejmana Ugljanina koji je u to vrijeme bio i ministar u Vladi Republike Srbije.

Njihovi pokušaji ubistva najvišeg bošnjačkog političkog rukovodstva bili su brutalni i unaprijed organizovani i smišljeni. Najprije su sa balkona i stepeništa bacali teške betonske žardinjere i stolove na glave stranačkog rukovodstva, a zatim su iz više komada vatrenog oružja i sa više hitaca pucali u pravcu Predsjednika Stranke i ministra u Vladi dr. Sulejmana Ugljanina.

Želim i da Vas obavijestim i da je Opštinski sud u Novom Pazaru donio presudu da je ova naoružana grupa povredila pravo državnine, a samim tim i ustavno načelo nepovredivosti stana.

S' obzirom da pored svega navedenog do danas ovaj slučaj nije riješen, kao ni brojni slučajevi drugih neriješenih zločina počinjenih nad Bošnjacima devedesetih godina, smatram da je to loša poruka koju država i državni organi šalju svojim građanima Bošnjačke nacionalnosti.

Podsjećam da je tek nakon 20 godina počelo rješavanje otmice, mučenja i ubistva Bošnjaka iz voza u Štrpcima, i pitam da li je potrebno da se i na rješavanje ovog zločina čeka toliko ili

se čeka da neko od političkih predstavnika Bošnjaka bude ubijen pa da se onda otvori istraga?

S' tim u vezi, tražim od Republičkog tužilaštva za organizovani kriminal da pokrene istragu i podigne optužnice protiv nalogodavaca, svih izvršioaca i svih pomagača u vezi pokušaja ubistva Predsjednika SDA Sandžaka i ministra u Vladi Republike Srbije dr. Sulejmana Ugljanina i neovlašćenog oružanog upada u službene prostorije naše Stranke od 16. i 17. januara 2009. godine.

Koja su to lica koja su neovlašćeno i do zuba naoružana upala u naše službene prostorije?

Ko je od njih ugrozio živote rukovodstva SDA Sandžaka i pokušao ubistvo bacanjem teških predmeta na glavu?

Ko je sve pucao iz tih više komada vatrenog oružja?

Kakva je uloga Rasima Ljajića?

Kakva je uloga Mirsada Đerleka, tadašnjeg gradonačelnika Novog Pazara?

Kakva je uloga Fevzije Murića, tadašnjeg člana gradskog vijeća Novog Pazara?


Kakva je uloga Jasmina Duštinca, zamjenika načelnika policijske uprave u Novom Pazaru koji je cijela dva dana navodno pregovarao sa licima koja su držala pod opsadom naše službene prostorije?

Kakva je uloga Dragana Terzića, načelnika policijske uprave u Novom Pazaru, te pokojnog Ćamila Hubića, tadašnjeg predsjednika Okružnog suda u Novom Pazaru i Saliha Karišika koji su svi na lice mjesta došli iste noći neposredno nakon izvršenja ovog zločina?

S' obzirom da se navršava već punih šest godina od izvršenja zločina, a da do danas nemamo nijednu presudu u vezi sa tim, očekujem da u najkraćem mogućem roku preduzmete sve potrebne radnje i pokrenete istragu.

Novi Pazar,  
19. januar 2015. godine

Enis Imamović



narodni poslanik  
i potpredsjednik SDA Sandžaka